

Jesu toh

SHI KHAWM IN HING KHAWM VAI

II Timothy 2:11-13

Tam thugen a gintat huoi ahi: Ama toh shi khawm ihi tahleh Ama toh i hing khawm ding uhi; I thuoh u'leh, Ama toh vai i hawm khawm dinga, Ama i kitheimawbawlleh, Aman zong ahing kitheimaw bawl ding hi. Eite muonhuoi sih nanlei zong, Amapen a muonhuoi ngitngat a, Ama leh ama a kitheimaw bawl thei sih hi.

I Samuel 16:7

“Asan lah leh a mel hoi lamah lunglut sin. Mihing in pulam a latdan a en a, hinanlezong keiman lungsim ahi ka et khu” achi hi.

Thumapui:

Pasian mapuina i tang ua, tam tan hing pui a, ama thu siengthou kikum khawm thei ding a ahing pui zieh in Mangpa Pasian kungah kipah thu i tut masa uhi.

Tulai thuthang tuomtuom atam a, Leitung pilnate a saang mamata a, sil kidang tahtah zong a tung a, Malaysia lenna man dan bang sil lamdang mama leh leitung pumpi in a bildaw lai in News khat min “Before it news” kichi khat in Afghanistan gam a um ahidan bang a gen a, tuachi lai in Indian Ocean tung ah lenna sui pawl a kisan mama uhi. Tuipi sung thuhpeen a Black Box mu ding bang kinem in nasatah a sui ahia, aging bang zah ahi zel hi.

Jesu shina leh thawkiana thu khu tamveipi ina gen zouta ua, a tangthu theilou zong i um nawnsih ding uhi. Tuni in Jesu shi ni ahi toh kituoh in Za nitah leh tu sun hun ah a tangthu tomkim izata ua, tu nitah in a tangthu pen i ha gen nawnsih ding ua, Sawltah Pawl in Timothy kunga a gen Lai Siengthou thu ei Khristiante kingahna bulpi “Jesu toh shikhawm leh hinkhawmna thu” i gen ding uhi.

I Lai Siengthou simna in Jesu toh shikhawm ihitahleh Ama toh i hing khawm ngei ing chi thu ahing genpieh a, ahin tamna thei ding khat ahileh Jesu toh i shikhawm uleh hing khawm ding ihina ah i shi khawm lou uleh i hing khawm theisih ding uh chi thei masah ding in a deihuoi hi.

JESU TOH | 2

Jesu a telna mun ah i guolzou ding ua, Jesu tellouna mun ah guollet ihi uhi. Laphuotu in “Mang Jesu toh bangkim a loup i hi” achi a, Peter in zong mellamdanna taang ah Jesu hina a thei a, a muchien chieng in nop sa sengseng in “Mangpa tam mun ah um den vai in puonbuh thum, khat nang a ding, khat Mosi a ding leh khat Elija a ding” ana chi a, Immau khuo zuon a thawmhautah a lampei nuajui nite zong Jesu toh a pei chiengun nuom asa mama ua, a thawmhaunate uh bei in Jesu toh giekhawm ding in a chiel ua, mitvahna a nei law uhi. Nuajuiten zong Jesu toh a umkhawm lai un nuom asa mama ua, a maingal ua, hinanleh Jesu mat a a um chieng in a thawmhau ua, bangma a sem ngam tasih uhi. Tuachiin Jesu hagau a ngah ua, Jesun a chiem Hagau Siengthou a nga tah un hing hangsan kia in munchin ah Khantan Hoi puongzah in shi tan in zong a zau nawnsih uhi. Tuaziehin ishi in zong i hin in zong Jesu toh hileh deihuoi isa mama uhi.

Mishi:

Mizo Chiemnui siempa Thangkura in a chiemnui bawl na a “*Mithi awm dan mawi*” chi a genna ah “*I shi chieng ua i pia lou ding uh ahi. Miten ahing kaa ding ua, Bawi aw, Pu aw, Pi aw, Nu aw, Pa aw, hing thoukia in chiin ahing kaa khum ding ua, hinanleh i thawkia vawtlou ding uh ahi. Mite leengkhawm in laa sa nan uleh i sahpi hetlou ding uh ahi*” achi bang in mishi in bangma a bawl thei nawnsih a, hil zong a ngai nawn sih hi.

Jesu shina

Jesu zong sillawmdang bawltheipa, mishi nasan kaithoupa ahivang in a shi in bangma a bawl thei nawnsih a, Joseph in a luong a lakhie a, han tha khat ah a vui a, tuachiin hansuong a sit khumta hi. Tam hun lai in Mangpa Jesu ngei zong bangma bawl theilou in ama uh siel dandan in a um a, thupina a kaithaw ahiding hun a ngah mai ahi.

Eite shi dan:

Sawltah Pawl in Jesu toh shikhawm ding achi a, Jesu toh i shikhawm sihleh Ama toh hingkhawm theilou ding ihi dan chientah in ana gen hi. Tuni in eite Jesu toh shikhawm i kichi ua, hinanleh mishi umdan kilawmtah bang a um theilou in eite lah ah tamtahte shidan khu a lamdang a, i utut uh i bawl thei ua, i ut uleh i ham thei ua, phuba i la thei ua, i utna munmun uah i haw thei veve uhi. Jesu khu kaithaw a um theina ding in ashi masah a ngai bang in eiten zong Hagau hinna i nei theina ding un tahsa khelna a shi masah a ngai hi. Hinanleh eite tahsa deidan shisan ichi ua, i ut dandan ua i um thei veve

uleh Hagau a hinna kaithawna tahtahpen i tang thei sih ding uhi. Mishi in bawl thei a nei nawnlou lai in eiten i ut ut i bawl thei ua, i utleh mi i house thei ua, mi i dem thei ua, mi toh i kihau thei ua, tuol zong i that thei uhi. Ang i kawm ua, i guta uhi. Jesun lah “mi mudana mit toh na etleh tuol na that zouta hi” ahi chi a, mi khat deigawna mit toh na etleh ang na kawm zouta hi” achi zel a, bangchin i suohta tading uoile?

Palm Sunday i man dante bang uh i et chieng in thanguoitah zong a um hi. Miten “Hosanna” chia kikou a, kipah leh thanuomtah a lampi a zui lai ua, Lamgei a mangthang kipah leh thanuom tah a lampi gei a ding nungah-tangval bang zong a tam mama hi. Ahilouleh lampi zui ding a pawt in lampi tan tung zoulou zong um thei kha ding hi.

Mihing umdan:

Mihing in hinna i nei chiengin nahna hu inei ua, lam i zawt thei ua, Miten ahing houpi chiengun i dawng thei ua, na i sem thei ua, i kipah thei ua, tuama bang in i da thei uhi. Gilgiel dan i thei ua, dangtah dan i thei ua, tuaziehin ann i ne un tui i dawn uhi. I kim i paam a sil umte i mu thei un ngaituona kichientah i nei thei uhi.

Eite hindan:

Eiten hinna ka nei ichi ua, hinanleh i hinna gui toh kizop Pasian ah nahna hu i la theisih ua, sil hoi bawl dan i thei sih ua, miten ahing houpi chieng in zong dawn dan i thei sih ua, hagau a gilkiel dan leh dangtah dan zong i theisih ua, hing thei leh hat i kisa mama ua, hinanleh Mangpan mitmu in ashi toh kibang ihi uhi. I hattuom in bang a poimaw ei chia ngaituo theina kichien zong i nei theilou uh hilou ama? Sawltah Paul in hat ka kisah lai in ka na hat sih a, hatlou ka kisah lai in ahat ka nahi achi bang in tunin ei Hattuom kien tha lei, hat i kisah nate bang i hatlouna thupipen zong ana hi maithei ahi. Bangma tahsap neilou in i kikoi ua, i Hattuom um dan enlei, i lasah dante, i thugen dante, Pasian thu i du lou dante bang i hatlounate zieh ana hi maithei ahi. Lamkaiten zong ngaituo tha va ui. Pastor, Upa, LCC, Numei lamkai, Khanglai lamkai, Naupang lamkai leh Hattuom mimal chinten ngaituo lei i dei uhi. I tahsa deina leh kiletsahnafen a shi ding hinapi in i hingsah tentun ua, hagau a hing ding hinapi in hagau ah i shi ua, hinanleh hat i kisa mama uhi. Ei guoh ihisih ua, tulai Hattuom zousie natna a dim sieng ahita hi. A kithat zoulou AIDS natna vei bang in i gitlounate i that zou sih ua, mite lah ah lah adam bangbang in i vah ua hinanleh natna damtheilou toh vahkhawm ihi maithei uhi.

JESU TOH | 4

Hagau a i shi zieh un i dangtah lam zong i theipha lou uh ahi kha diei maw? Mish i in gilkiel lam a theilou bang in hagau a i shi zieh un hagau dangtah ihi lam zong i kithei sih ua, eima hoi i kisa mama ua, mite i dem ua, Pasian/ Pawlpi sang a eima mimal kipoimaw ngaizaw ihi kha ding uhi. Lamkaiten mipite mawsah, Mipiten lamkaite mawsah. Sawltah Paul in “Na hina uleh Khrist khantan hoi hing kituoh masa phot heh” ana chi a, i umdan uleh Khrist khantan hoi a kituoh lou laisie tahsa deidan a hing, hagau a shi ihi uhi.

I kikhop un zong i mihin dan a tahlang mai hilou maw? Tu sun in mi a tam mama a, Biehinn i dim phetphut mai uhi. Hinanleh tu in en wawi ule, a kim khat zong kiluo zou nawnlou ahi. Getsmani huon a Jesun a nuazuite kung a “Nai kaal khat sung maimai nei ngah zou lou uh bangchi dan atai?” achi bang in Jesu Khrist ei a ding a ahing thuoh ni i zang ua, hinanleh ni khat a nivei kikhop zong zou loute ihi tamai uh hilou maw?

Jesu toh i shikhawm sihleh i hingkhawm theisih ding uhi. Jesun Lazar a kaithaw ding in kaithaw a a um theina ding in Lazar a shi masah a ngai a, Jesu ngei zong kaithaw a a um theina ding in a shi masah a ngai hi. Lazar shilou hileh Jesun a kaithou thei diei? Jesu kaithaw a ngai diei? Eite zong i shi masah louleh bangchin mangpan ahing kaithou thei diei? I shi a kaithaw a i um sihleh hinna tha bangchiin i nei thei diei? Hinna tha i nei theina ding in i shi masah a ngai ua tuachieng in kaithaw in i um ding uah tuachiin hinna tha nei in i hing tading uhi. Tuaziehin Jesu toh i hinkhawm theina ding un Jesu toh shikhawm masa va ui. Tuachiin jesu toh thawkiana ni ah i thou kia ngei ding uhi.

Tahsa dan:

Galati 5:16-20 sung ah Tahsa dan leh Hagau dante imu uhi. Tahsa dan khu:

1. Huasanna = Aangkawmna Matt. 5:28 ah “... Koi in zong numei khat deigawna mit toh a etleh lungsim in aang a kawm zouta hi”.
2. Thanghuoina = Thangtatna = Gin-umlouna (Hattuum sung, Society leh mimal tan ah gin-um a ngai hi. Israelte gin-umlouna khu Pasian in nu-le-pa kaal a thangtatna leh aangkawmna bang in ana gen hi).

JESU TOH | 5

3. Milim biehnah = Kol. 3:5 ah "... huoihamna (Khum huoihamna khu milim biehnah toh kibang ahi). Ei tantawh a lungkimlou leh mi a ding nasan zong dei nalai khu huoihamna ahi.
4. Bumna = Dawithu toh bumna ban ah mi utlouna pi gen hat thu a utsah, hisahna, kam hat thu leh paubawl thu a mi bawlsah zong khu bumna chi khat ahi. Thudihloupizong gen dihsawm teitei. Ahoiloupizong gen hoisawm teitei. Eima a ding ahipoulehmisietding zong khawhsalou a bawl maina khu bumna chi khat ahi.
5. Kimudana = Thupil 10:2 "Kimudana in kihauna a piengsah" achi a, kihauna, kituohlouna kipatna khu mudana ahi.
6. Kihauna = Thupil 17:19 "Kihauna it miin khelna a it hi" (KJV)
7. Ki-engsietna = Mite a ding a engsietna
8. Lungthahna = Eph. 4:26 "Na lungthah ua ahilezong na lungthahna khu tuonsuo sihun. Na lungthahna khu ni in tumpisah sin.
Jacob 1:20 "Mihing lungthahna in Pasian sil guot deitah a mu theisih hi"
9. Huoihamna = Milim biehnah toh kibang ahi (Col. 3:5)
10. Kimatlouna = Kituohlouna ah hatna a um theisih a, khatouna zong a um theisih hi.
11. Kilangkhenna = Mk. 3:24 "Gam khat, Innkuon khat leh Setan nasankilangkhen in kidou taleh a mangthai zaw ding hi" Hup tuom, pai tuom neina. It tuom muda tuom neina ahi.
12. Kithangsietna = Kithangsietna neilou i um ngel ding uoi? Mi khat in sil khat aneileh keizong neileng china lungsim zong khu thangsietna ahi.
13. Zukham hat = Zu nunnop toh kibang ahia, Eph. 5:18 "Zu dawn kham in um sihun, Na hindan uh suse va uteh" ana chi hi.

Hagau deidan:

1. Ki-itna = I Korin 13:13 "... A lienpen khu itna ahi". "Pasian in vanney a it sengseng zieh in a Tapa tangkhat neisun apie hi" (Jn. 3:16). "... Ka thupieh khu tami ahi. Noute khat-le-khat ki-ttuo chiet un" Jn. 15:12 & 17. "Miin a lawmte a ding a a hinna apieh sang a itna sangzaw a um sih (Jn. 15:13). "Koi in zong a lawmpa a itleh a tungah sil hoilou bawl vawtsih ven aw" Rom. 13:10. "Itna in a thuohzou a, a tawpsan ngaisih a, lam-etna leh douzawna amansuo sih a, a detdou a..." II Kor. 13:7.
2. Kipahna = Plhil. 4:4 "Mangpa ah nuom tawntung un hing chi kia leuleu vang. Nuom un!
3. Kilemna = II Tim. 2:22 "... kilemna del zing in" Matt. 5:9 "Lemna siemte khu a hampah uhi. Pasian tate kichi ding ahiman un".
4. Thuohhatna = Mt. 5:10 "Dihtatna zieh a bawlsietna thuohthe a hampah uhi, Van gam ama ua ding ahi man in". Lk. 21:19 "Na thuohhatna un na hinna uh a humbit ding hi".
5. Zainemna = Mt. 5:5 "Lungnemte khu a hampah uhi, Lei gou luo ding ahi man un!"
6. Hoina = Rom. 12:21 "Sietna in kizousah sih unlen, sietna khu hoina in zousah zaw un".
7. Gin-umna = Gin-umlouna khu aangkawmna toh kibang ahi.
8. Nunnemna = Zainemna toh kibang ahi.
9. Kidehtheina = Bangteng tung ah i mihina pen hing kuong zel nanleh tam kidehtheina a poimaw mama hi. Tam kidehtheina in khelna zousie apat ahing vengbit ding hi. Eden huon apat khelna hing lut khun ahing nuasie sih a, hinanleh tam kidehtheina in a hing vengbit zaw hi.

JESU TOH | 7

Lk. 23:34 Jesun Kross a ashi ding kuon in “Pa aw, amau uh ngaidam in! A silbawl uh a theisiem sih uhi” achi hi.

Rom. 5:6 ah “Ajiehpén panpitu neilou a i um lai un Pasian hun chiem laitah in Khrist khu migiloute a ding in ang shi hi” achi hi. Migiloute khu a gaalte ihi ua, ama tatna ziehin Pasian mipite ihing hi theita uhi.

Lk. 6:27-32 i simleh hichiin ana giel hi.

Hinanlezong ka thugen ngaikhete aw, ka hing hil ahi: Na melmahte iit unlen, nou hing mudate tungah sil hoi bawl un. Nou hing bawlsete thu ngetpieh un. Koi in zong na phe langkhat ang behleh lang khat zong bengsah in. Koi in zong na aangkii ang lahpiehleh na puon-aah zong la taken. koipou in na neitah a nget a ahileh pie inlen, koi ahiei in na neisa a lahleh ngen kia nawnsin. Tuachiin miten na tung a a bawl ding na dei bang in mi tung ah bawl in. Mi nangma hing itte bou na itleh guoljawlna hei ah na mu tadiet? Migilouten bawn ama uh itte it zuh ua achi hi.

Tam a tung a i gen Hagau silte neilou a, tahsa deidan neinapi a Hagau ah ka hing ichi laisie zuou gen hiding ihi. Lai Siengthou in leh tahsa deidan leh Hagau dei dan umkhawm theilou chi chientah in a hing hil ngal a. Tahsa deidante taisein a khelna lam a i shi louleh Hagau in i hing theisih ding uhi.

Aleh, guoite tuni in ei Hattuumte a dieh in banglam ah i um uoile? Ei-le-ei kisol sih va ui. Tuni in Jesu a shi a, a thawkia bang a eite zong Hagau hinna toh i thawkia theina ding un i tahsa deidante Jesu toh Kross ah thatlia vai in; Mangpan ahing kaithou ding hi. I shi sihleh hing kaithou theilou ding ahizieh in tuni mama in shisah va ui. Kum tamtah Good Friday ina mangta ua, Jesu maimai i shisah ziehun Jesu maimai thoukia in imu ua, eite ishi lou ziehun Jesu thawkiani in i thou kia theisih uhi.

Tuni in Jesu shi ni in tahsa deidante shisah vai in hagau deidante Jesu Khrist toh thou a, thawkiani vaidawn a zang thei ding in kisinga va ui.

Mangpan Ama toh shikhawm a, ama toh thoukia khawm ding in theisiemna leh ama a kipiekhiet ngamna hing guon chiet taken.

.....